



Арман

(Тұңғыш әңгіме)

 астар кешін басқарып жүрген ұзынтұра жігіт ортаға шықты да, жұрт тыныштала бергенде:

«Ендігі кезек – вальсқа...
Қатардан, дос, қалыспа.
Тұңғық көзді құрбынның
Арманын баста алысқа», –

деп тақпақтай жөнелді. Риза болған жастар ду етіп, іле-шала ойнай жөнелген би еркесінің жаңа бір еркін әуенімен сынапша толқып, қозғалып та кетті. Студенттер болса керек – кеш атаулыда жиі көзге түсіп жүретіндердің екі-үшеуі елден бұрын қам жасап, жұбын жазбай жүрген бір топ «үкілі» қызды бөлісіп те алды. Жігіттердің «сен бар да мен бар» деп бірін бірі алдарына салып итермелейтін бозандау жақтары әлі шеттеп жүр.

– Рұқсат етсеңіз!..

Музыка тындап бейқам отырған Наз алдында тұрған тұлғалы жігітке көз салды. Бірден келе қалған ой: «Кешіріңіз, демалып отыр едім», – дегісі келіп еді, алайда биге шақырушының түрін көрді де, мүдіріп қалды.

Манадан бері бұл жігітті Наз байқаған жоқ-ты. Ұзын бойлы, қапсағай бітімді. Ашаң қоңырқай жүзіне, келте қырықтырып, бірқырын тараған шашына, жалпы бас қондырысына қарағанда, бұл кеш атаулыдан қалмай, би қуып жүретіндердің бірі емес:

үлкен қой көзі байсалды, тіпті, мүмкін, ақылды көрінді. Бірақ киім киісі салақтау: екеуі бірдей сыртына қарай қисайып тозған кебесін тазартынкыраса болар еді; тімтәуір бешпетінің өңіріндегі үлкен дақты киімнің шымқара түсі де жасыра алмай тұр; жейдесінің жағасы ағытулы, оның да түймелері түгел емес сияқты.

Жеңіл көтеріліп, құрбысының алдына түсті Наз. Бұлар енді ортада билеп жүр.

Оркестр вальстың ең бір айшықты әсем жерін ойнай бастап еді. Қатты сүйсініп кеткен Наз кенет қолын жігіттің иығынан түсірді де, музыканттарға қарап бір сәт тұрып қалды.

Саз бұлтқа айқасып еркін түтеген тентек құйынның дәл өзіндей еді. Наз жігітке оқыс бұрылды. Сол-ақ екен екеуі үйіріліп кете барды.

– Сіз неге көңілсізсіз? – дейді құрбысы.

– Әшейін.

– Бүкіл кеш бойына билеп жарытпадыңыз. Сол бір орында отырдыңыз да қойдыңыз. Неге олай?

– Әшейін...

– Сонда да?

Наз жауап берген жоқ.

Бірінші айналым бітіп, әуен көпшіліктің сұрауымен екінші қайтара ойнай бастады. Наз жігіттің жүзіне қарап еді, ол бұрын бір жерде көрген адамы сияктанып кетті. Қыр мұрынды, ат жақты, қуқылдау келген бет әлпеті таныс емес, бірақ мына нұрлы терең жанарды әйтеуір бұған дейін кездестіргені анық.

Наз соңғы биді тағы сол құрбысымен билеп, кеш біткесін екеуі сыртқа бірге шығып еді.

Түннің біраз уақыты болған. Бар таныстығы – мұнымен екі-ақ рет билегені, Наз атын да білмейтін бейтаныс жігіт, рұқсат та сұрамастан, асықпай мол адымдап жанында келеді. Соның алдында ғана жаңбыр жауып өтсе керек, асфальт айнаша жалтырайды. Көшеде жүргіншілер де аз, мәшина да саябыр. Суға малшынып малмандай болған теректердің көленкесі де бір түрлі қойыла түскен сияқты. Басқа кезде еленбес еді – оқта-текте шыққан дыбыс құлаққа жағымсыз, қатты тиеді.

Орталық көшені кесіп өтіп, бұлар театр жанындағы скверге шықты. Көшедегідей емес, бұл жерде ел әлі баршылық екен.

– Тамаша жер, – дейді Наздың қасындағы жігіт. – Қол бос кештерде мен көбінесе осында келіп, демалам. Әрі жатағымызға

жақын, әрі өте тыныш қағаберіс. – Ол бойжеткен не дер екен деген кісіше тосылып, үндемей қалды.

Бір сәт Наздың есіне өзінің жолдас болып бірге келе жатқан кісіге көшеге шыққалы тіл қатпағаны түсті де, оған бұрыла шырайланып:

– Сіз музыкант емессіз бе? – деп сұрады.

– О, жоқ, – деді жігіт. – Әрі жұмыс істеймін, әрі оқимын. Қазір де, болашақты да құрылысшымын.

– Мектеп, балабақшаларға арнап үйлер саласыз екен ғой?

– Дәл солай...

– Көзіңізге қараңыз, шалшыққа түсіп кетпеніз.

Бұлар біршама үлкен екі қабатты үйдің ашық тұрған қақпасына келіп кірді.

– Мен осы үйде тұрам, – деді Наз. – Әкеліп салғаныңыз үшін көптен-көп рақмет!

– Кідіре тұрыңызшы, бір ғана сәтке, – деді жігіт. Манызды әлдене айтқысы келген кісіше ілгері ұмтылып, оқталып-ақ қалып еді, бірақ онысын айтпады. Сөзін ойнақы, көңілді аяқтады: – Жайлы ұйықтап, жақсы тұрыңыз! Рақмет айтпауға да болады, оның орнына менің бір өтінішімді орындасаңыз, барлығы да өтеледі... Жақсы түс көріп шығамын деп уәде берсеңіз болды.

– Жақсы түс?!

– Иә, жақсы түс, – деді анау, Наз түсіріп алған кілтті жерден көтеріп жатып. Келесі сәтке әлгіні ұсынып еді, Наздың созған қолы кілтке ілікпей, саусақтар мен саусақтар айқасып кетті. Бұған дейін ешнәрседен секем алмаған Наз не болғанын ойлап та үлгермеді – жігіт оның сол қолының басын қаусырып, өзінің құрғақ та ыстық уысында бірнеше секунд ұстап тұрды да, қоя берді. Сосын:

– Мен ертең сізге келем, – деді.

– Не шаруамен?

– Ертең күн болса жексенбі, сізді тағы да көргім келеді.

– Қолым бос емес менің.

– Мен көмектесейін сол шаруаны бітірісуге?

– Бұл немене тағы?! – Наз басқышпен жоғары шыға бастап еді, кері түсіп, жігіттің жанына келді. – Сіз, не өзі, ғашық болып қалғаннан саусыз ба?

Жігіттің тарапынан жауап болмады.

– Олай болса айтыңыз, бір көрген адамға табанда ынтық болудың тәсілін біз де үйренейік.

– Мен сізді көптен білем, – деді жігіт.

– Тамаша! Үйіңізге барыңыз да, күтіңіз. Мен де әуейі болған күні өзім хабарласамын.

Наз бұрылып жүре берді.

– Менің сіздің алдыңызда жазығым жоқ еді ғой, – деді жігіт. Қыздың соңғы сөзі шымбайына батып кетсе керек, аса көңілсіз, барлығын да түсінген, түңілген адамның түрімен айтты.

Мұны естіп, әдетте ешкімнің көңілін қатты сөзбен жықпауға тырысатын Наз өзінің тарапынан болған әділетсіздікке өкініп қалды. Есіктің тұтқасын ұстаған күйі жігітке бұрылып, бейтарап үнмен:

– Айтып көріңіз онда, мен туралы не білесіз екен, – деді.

Жігіт қалтасынан шылым шығарып, тұтатты. Бұған дейін ол ондайын көрсетпеп еді («Өзін өзі тежеген болды ғой!»). Басқыштың бірнеше баспалдағын аттап, жақын келді.

– Амал не, бәрін түсінем... ал хат жазу менің әдетімде жоқ. Сондықтан тыңдаңыз, – деп бастады ол. Даусы бұл жолы қарлығып шықты. – Бұдан үш жыл бұрын алғаш осы қалаға келгенде сіз үстіңізге ұсақ гүлді ақ көйлек киіп келдіңіз. Әп дегенде мен сіздің жүзіңізді емес, ту сыртыңыздан, сол көйлектің гүлімен көмкерілген беліңізден төмен түсетін екі бөліп өрулі шашыңызды көрдім. Келесі кез болғанда сіздің киіміңіз де басқа еді, шашыңыз да жиюлы болатын, бірақ жүз бергеніңіз де мен сізді бірден таныдым. Қателесу мүмкін емес еді... Институтқа түскен соң сіз орталықтан қашықтағы жататын үйіңізге кеш қайтқан күндері шығарып салайық деген жолдастарыңыздың ұсынысын әзілге айналдырып, жолатпайтынсыз. Кейбір өте қараңғы жерлерде елегізіп қорқатыныңызды мойындауды ар көретінсіз. Бірақ сіздің қорқынышыңыз бекер еді... Сосын... сосын оның қажеті болмай қалды, сіз қорықпайтын болдыңыз...

Жігіт шылымын жидірмелете әлденеше рет сорып, әрі қарай сөйлеп кетті:

– Соңғы екі маусымда сіз «Демонды» жеті рет тыңдадыңыз. Ақырында, – деп ол темекінің тұқылын сыртқа қарай лақтырып жіберді, – мен сізді әлденеше рет биге шақырып, бүгін бірінші рет биледім.

Наз ештеңе деген жоқ. Жүзін де, денесін де құрбысына бұрыңқырап, қараңғыға үңіліп еді, бірақ оның реңін көре алмады.

– Қош болыңыз, мені кешіріңіз... – деді өте жұмсақ үнмен.

– Қош болыңыз, Наз!..

* * *

Наз бөлмесінде, терезе алдында отыр. Бүгін оған әдетінше інісі соғуға тиіс еді, неге екені белгісіз, кешігіп жатыр.

Көшеде ерсілі-қарсылы ағылған халық. Ашық тұрған терезе арқылы, теректердің түбінен бе әлде арықтан ба, ызғарлы леп келеді. Үй мен иін тіресе тізілген теректердің арасынан, жоғарыдан, аспанның ұзыннан-ұзақ созылған жол сияқты бозамық-сұрғылт бөлігі көрінеді.

«Сұр бұлт түсі суық қаптайды аспан...» Сол-ақ екен, Наздың есіне алыста қалған үйі, ата-анасы түсті.

Жылдағыдай емес, биыл ата-анасын, жақындарын көріп, мауқын басып қайтудың мүмкіндігі жоқ: інісі келді, ештеңенің мәнісін білмейтін, тауқымет көрмеген, «әйтеуір оқимын» деген лапылдаған жігермен келген оған бас-көз болып оқуға түсірудің қамында жүрді; соңынан өзі институттың сырттай оқытатын бөліміне ауысты да, жұмысқа орналасты. Ата-анасына енді қашан соғып, хал-жағдайларын қашан өз көзімен көріп қайта алары белгісіз. «Неге ата-ананың өмірі балаларының өміріне қарағанда ылғи да қиын? – деп ойлады Наз. – Бірақ соған қарамастан олардың шүкіршілігі де солғұрлым мол. Ғажап! Азды көп ететін, көпті көл ететін таптырмайтын абзал қасиет!...»

«Әкелердің өмірімен салыстырғанда біздің кейбіреуіміз не істеп жүрміз? Бір нәрсеге қолымыз жетсе – толдық деп тастық, бір рет таяқ жесек – аспан айналып жерге түскендей, күйрек ойдан арыла алмадық. Ел ержетті дегенде, аяғынан тік басып кетті дегенде, тоқсан толғансақ та, туған жерге соғып, топырағын, бетегесі мен жусанын иіскеп қайту қолдан келмейді...»

Енді өзінің балалық шағы түсті Наздың есіне. Сөйтіп қарттарына байланысты мазасыз ойына бала кезіне деген сағыныш сезімі келіп ұласты.

Наздың қарттары бұл кезде өздерінің ата қонысында, соғыстан кейін көшіп келіп орналасқан жерінде, тұрады. Ол жер белес-белес құм-шағыл, мыңғырған мал – бір кездерде асыра сілтеушіліктің кесірінен көшіп кеткен жұрт қайтадан бас құрап, бір тайпа іргелі елге айналған атырап. Наз сол жерде жеті-сегіз жыл оқып, бұғанасы бекіп, адам болды, орта мектепті бітірген соң жұмыс істеді.

Бірақ Назға ыстығы, ойынан кетпей сағындыратыны ата-анасы кейін қоныс еткен жер емес, – одан көп алыс жатқан елеусіз ауыл. Өзі өте шикі кезінде тастап кетуге мәжбүр болған, қазір тұрып есептегенде он бес жылдай көрмеген Миялысы. Өзінің ертеден

кешке дейін тұлымшағы желпілдеп тынбай жүгіріп, шешесі жұмыстан кеш қайтқан күндері шаршап, құдығының басында талай ұйықтап қалған туған мекені.

Наздың ойы кенет аласапыран шатасып кетті де, ол түрегелді. Оны мазалаған түйдек бұлттың найзағайындай кенет сап ете қалған бір күдікті шүбә, болжам еді.

Бір орында тұрақтай алмай, бөлмені кезіп кетті. Біраздан кейін ғана басылып, көңілі тыншып, қайтадан бұрынғы орнына отырған Наздың есіне енді соғыс бітерден дәл бір жыл бұрын болған оқиға түсті.

Бір күні көршісі – жасы өзінен аз ғана үлкен Арманға ілесіп Наз да мектепке барды. Қоңырау беріліп, өзге балалар ішке кіріп кеткенде бұл мұғалімнен қорқып кірмей, сыртта қалып қойып еді. Көп кешікпей балалар үйді-үйіне тарай бастады: түс қайта салқын түсе келдек теруге бармақ екен. Сол балалар қайта бас қосып, мектептен бір топ болып, шыққанда, анасының басы жоқ ескі шұлығын алып, Арманға қосылып, Наз да ілесті топқа.

Олар егін алқабында кешке дейін келдек терді. Кешке күні бойы жинағандарын колхоз қырманына тапсырып, улап-шулап ауылға қайтты. Кішкене Наз ғана басқа балалар басып, ұшырып берген орта шұлық тарысын тапсырған жоқ.

Ол күн мұның есінде ерекше сақталған. Қаранғы түсе бастаған мезгіл еді, бұлар ауылға таяп келіп те қалған болатын. Кенет алдарынан шоқытып жирен қасқа ат мінген, егінді қарауылдайтын қарт шыға келді. Наздың қолындағы шұлықты көріп, қарауылшы айқайлап қоя берді.

Қорыққаннан естері шығып, қалшиып-қалшиып қалған балаларда үн жоқ. Наз болса ештеңе түсінбейді. Мына шал неге осынша айқайлайды екен?

– Бұл не деймін сендерге, айтыңдар жандарыңның барында?

– Ол – тары.

– Тары болса, неге аласыңдар?.. Әкел бері дорбаны!

Қарауылшы еңкейе бере шұлықты тартып қалғанда Наз аттын аяғының астына құлап түсті.

– Ай!.. А-а-аһ!..

Кенет шыңғырған ащы дауыс аспанның астын тұндырып жіберді. Жан айқайымен бірге кесекше атылған Арман сол сәтте жиреннің тізгініне қос қолдай жабысып еді.

– Өй-өй, өй!..

Күтпеген бәледен үркіп, жирен атылды. Бірақ Арман тізгінді босатар емес, доппа домалап жүр. Айнала көк-ала шаң. Бір кезде тізгіні босап кетті де, оскырына атылған жирен ат шалды түсіріп кетті. Томардай денесімен шалқалай құлаған ол жерден тұрып үлгермеді – Арман барып, жағасына жабысты. Ұрып жүр.

– Мә саған, мә!

– Әй, мына күшік неғылады-ай? Ойбай-ай, елге масқара етті-ау!..

Басқа балалар тырым-тырақай қашып кеткенде Наз ғана табан аударған жоқ. Содан біраз кейін әйткенмен де ақыры таяқ жеген Арманмен үйге бірге қайтып еді.

Осы оқиға болған күннің ертеңіне Арманның соғыстағы папасынан «қара қағаз» келді.

Кенет Наз әлдебір қимылын аяқтамаған тұрлаусыз қалыпта қалды. «Мен неғып, қара басып...: мандайы, көзі, күлкісі, шашы... тек қана, тек қана сол, тәңірім-ай!...»

Кереуеттің басына көлденең асылған желбегейін асығыс ала салып, үйден шыға жөнелді. Келесі сәтте-ақ көшені кесіп өтіп, бұрыштан айналып кетті.

* * *

Наз не істерге білмей скверде тұр. Көшеде жүргінші ығы-жығы көп еді, ал мұнда, әдетте демалушылар арылмайты бұрқақтың жанында екі баласымен отырған жас әйелден өзге, ешкім көрінбейді.

«Келмегені ғой! Әлде іссапармен жол жүріп кетті ме екен? Қашан кетемін деп еді кеше? Жазған басым, неге тыңдамадым сөзін, басқа ұрған балықша есенгіреп, жоқтан өзгені ойлап?!»

Наз енді бағыт-бағдарсыз сенделуге көшті. Шарқ ұрып жүр. Жок! Бірте-бірте әбден күдер үзді, шаршады. Сөйтіп, енді пәтеріне қайтпак болып кідіріп еді, бұрыс бір қуыстан, бұрын орындық жоқ жерден, тағы бір орындықтың шетін шалып қалды көзі. Кенет лықсып келген қуаныштан жүрегі аттай тулап, басы айналып кетті де, әуелі тек қисық кебісі ғана көрінген әлгі кісіге қарай беттеді. Іздеген адамы бұған сыртын бере бірқырын, шылым шегіп отыр еді.

Наз сәл саябырсып, жақын келді.

– Арман!...

Шылым жерге түсіп кетті.

– Сен мені таныдың ба, Арман? Мен тек қана Наз емес, мен өзіңнің Назың едім ғой.

Бұлар біріне бірі қарсы ұмтылып, екі-үш қадам жетпей тұрып қалды.

– Сен неге үндемейсің? Осынша уақыт неге жасырынып, үн-түнсіз жүре бердің? Неге алғаш көргенде-ақ тоқтатып, «Наз!» демедің? Қай уақытта болсын, қандай күйде болайын, кімнің қасында болмайын мейлі, сол бір ауыз сөз жеткілікті емес пе еді маған! Кешеден бері сенің бет-әлпетін, түр-түсің көз алдыма келе берді. Мүмкін бе, мүмкін бе осындай бағыттың көктен түсе қалуы?!.

– Наз!..

– Есінде ме, Арман...

– Тоқтаңызшы! Кішкене сабыр етіңізші, өтінемін, Наз! Аз уақыт кідіріңізші, мен сізді түсінбей тұрмын.

– Түсінбей? Неге?!.

– Сіз мені басқа біреумен шатастырып тұрсыз, Наз.

– Жок, мүмкін емес!

– Дегенмен, солай.

– Жок... А?!.

Наз бұрынғы қызуымен көзін кең ашып, жігітке абдырап қарады да, заматта өзгеріп жүре берді. Алаулаған қызыл бояуы бір сәтте өшіп, өңі құп-қу болып кетті.

– Айтыңызшы, – деді ол сонда да, қатты дағдарған қалыпта, – сіздің Наз есімді қарындасыңыз болмап па еді?

– Сабыр етіңізші тек...

– Айыпқа бұйыра көрменіз, кешіріңіз! Мен шынында да шатастырған екем. Қалайша?! Бала болып кеткенім бе?..

Оның әсіресе осы бір сәттік дарменсіз түрі көзге жас келтірерліктей пәк, сұлу еді...

«Орал өңірі», 19.12.1965 ж.

